

種樹節

顏旨微

管子牧民篇曰。樹穀一年。樹木十年。樹人百年。今樹穀乎。旱澁爲厲。而田園荒蕪也。今樹人乎。輟課廢學。而教育停滯也。則一年之事。與百年之業俱荒矣。

然則樹木乎。四五畝之宅樹以桑。今無有也。叔向過陳。以其國無樹。而歎其國必亡。而我之樹何在乎。民有餘力。地有餘利。舉目而得見者。唯故宮之喬木耳。全國之森林。不得謂非樹。而非我有也。

種樹乎。衍古制乎。應佳節乎。勸農事乎。雖不必有其實。而不可無其名。民且不能聊一日之生。而爲之樹十年之業。豈不懿歟。亦可哀哉。

(錄自顏旨微論評集)